

AR ROUE GRALON

HA KER-IZ



Moderato $\frac{1}{4} = 92.$



N'eus e Kér Iz netra 'nevez,
Rak ar festou-man 'vez hemdez,
N'eus e Ker Iz nemet traou koz,
Rak ar festou-man 'vez bep nōz.

Bodennou drez 'zo diouanet,
E dor an ilizou serret,
Ha war ar beorien o ouela
E laosker ar chas d'o drailha.

D'o c'houezek vloaz an holl verc'hed,
N'o deus Doue n' met ar pec'hed,
Ha da ober e gurunenn
E roont o c'haera rozenin.

Ahez, merc'h ar roue Gralon,
Tan an ifern en he c'halon,
Er penn kenta eus an diroll
A drein d'he heul ar gér da goll.

Sant Gwennole, gant kalonad,
Zo bet meur 'wech o kaout he zad,
Ha, gant daelou, an den Doue,
En deus lavaret d'ar Roue :

« Gralon, Gralon, laka evez,
« D'an dizurziou a ren Ahez,
« Rak tremenet vo an amzer,
« Pa skuilho Doue e goler ;

« El lec'h ma oa c'hoarzadeg kent,
« E vo neuze skrignadeg dent,
« El lec'h ma oa kanaouennou
« E vo klevet skrijadennou. »

Hag ar roue fur, spouronet,
E verc'h en deus bet keleñnet :
Met diskaret gand ar gozni,
N'en deus mui nerz da stourm outi.

Ha skuiz gant rebechou he zad
Evit mont eus e zaoulagad,
He deus grêt gant drouk-sperejou,
Eur palez kaer tost d'ar sklujou.

Eno, gant he amourouzien,
Ema, fenoz, an abaden ;
Eno, en aour hag er perlez,
Evel an heol, e par Ahez :

« Plijadur d'eoc'h, er palez-man,
« Merc'hed chentil ha paotred skany,
« Plijadur d'eoc'h ha nozvez grén, »
Eme eur Prins, en eur anfren. »

Ar Prins a zouge dilhad ru,
E varo a oa hir ha du,
E holl izili a verve
Hag e zaoulagad a zeve :

« Ra viot deuet mat, estranjour,
« Eme Ahez, gand eur beg flour,
« Ya ! ra viot deuet ar gwella,
« Mac'h anaveit an traou falla. »

« Neuze em bo digemer mat
 « A respontas an divroad,
 « Rak me, er fall, ' zo ken disket,
 « Hag an hini 'n deus her c'hrouet. »

Ha kerkent Ahez d'her pedi
 Da ober eun dro zans ganti,
 Hag an holl a eneb Doue,
 Gwasa ma c'hellent a doue.

Pa voe fin d'ar sakrilejou
 Kannad rus an drouk-sperejou,
 Chomet e-uman er palez,
 A dosteas da gaout Ahez :

« Va dousik koant, merc'h da C'hralon,
 « Ha muia karet va c'halon,
 « Ha n'hellfent me ket e nep giz,
 « Gwelet alc'houez sklujou kér Iz. »

« Va zad a zoug en e gerc'hen,
 « An alc'houez aour ouz eur chadenn,
 « Ha va zad brem an zo kousket,
 « Ha kaout an alc'houez n'hellan ket. »

Met hen d'he zreid en em strinkas,
 Ha d'he dournig flour a bokas,
 Hag he chalmas dre e zellou,
 Karget a dan hag a zaelou.

Hep gout ar pez a dremene.
 Neuze eur pennad ac'hane,
 En e bález ar roue koz
 A oa kousket e kreiz an noz.

Kampr paour Gralon ne oa enni
 Netra nemed eur grusifi,
 Deuet a zourn eur mignon ker,
 Sant Kaourintin, eskob Kemper.

Netra nemed eun Aviel
 Roet c'hoaz gand eun den santel,
 Roet d'ezan gant Gwenole,
 Evel eur merk a garante.

Kaer en e gosni 'vel eun Ael,
 E kouske roué Breiz-Izel,
 Hag en dro d'e dal e vlev gwenin,
 A ree, dispak, eur gurunenn.

Neuze, Ahez, ar brinsez fall,
 Evel pa vije skoet dall,
 En e gampr, heb aoun rak Doue,
 A deu da laerez an alc'houe.

En eur vale war beg he zroad,
 Ar verc'h a dosta ouz he zad,
 Ha gouestadik, eus e gerc'hen,
 E tenn, 'n eur c'hoarzin, ar chadenn.

Piou a deu du-hont gand ar ru,
 Pignet war e hinkane du
 Hag hen, d'an daou lamm, war e gein,
 Ken a strink an tan eus ar vein ?

Hennez eo kannad gwenn Doue,
 Degaset, en Iz, d'ar Roué,
 Hennez eo abostol ar Feiz,
 Sant Gwenole, karet e Breiz.

Tostaat a ra 'n eur c'haloupat,
 En e zourn dehou, e vaz ahad,
 Hag eur stol aour, war e zaë wenn
 Hag eur c'helc'h tan en dro d'e benn.

'N em gavet e dor ar palez
 M'eo kousket ennan tad Ahez,
 Divar e varc'h, an den santel,
 A c'halv, en noz, a vouez uhel :

« Gralon, Gralon, sav hep dale,
« Sav evit heulia Gwennole,
« Sav evit tec'het diouz ar mor :
« Sklujou Ker-Iz a zo digor ! »

Hag ar roue koz trubuilhet
Er mèz e wéle ' zo sailhet :
« D'in-me, d'in-me, va marc'h prima !...
« Siouaz ! Peurgollet ar gér-ma !... »

Ha gant glac'hар, e berr amzer,
E kerz da heul e vignon ker,
Ha war o lerc'h, en eur yudal,
E klevont ar mor o ruilhal.

Neuze ar brinsez dirollet
He amourous ganti kollet,
Dre Ger Iz, a gleiz hag a zeho,
A rede, dispaket he bleo.

Met pa glev daou lamm ar c'hezeg
A-raok ar mor o tiredek,
Dre al luc'hed, gant nec'hant,
C'h anavez he zad hag ar zant ;

« Va zad, va zad, mar am c'harit,
« War ho marc'h skanv, va c'hemerit, »
Hag hep respont, an tad tener,
A zav e verc'h war an talier.

Kerkent ar mor a vuanna
Ha Gwennole, en eur grena,
A gri : « Gralon, taol an diaoul-ze,
Diwar dalier da hinkane ! »

Koulskoude c'hoaz leun a enkreuz
An tad a zalc'h ar bec'herez :
Met ar zant a ra sin ar groaz,
A deu hag a sko-gand e vaz.

Kerkent mestrez an drouk-spered
A ruilh er mor bras fuloret
Hag e klev tost ar roue koz
Eur c'hoarz skiltrus e kreiz an noz.

Met, rentet skanfoc'h, hep dale,
E sailh prim da heul Gwennole,
Hag e varc'h, glep e beder c'har,
A lamm eus ar mor d'an douar.

Da zav-heol ar zant ha Gralon
A bigne war lein Menez-Hom,
A zav a-uz Douarnenez
E dreid gantan ebarz en trèz.

Ac'hano, roue Breiz-Izel
War e lerc'h a daolas eur zell ;
Met, e lec'h Iz, gant he dek dor,
Ne welas mui nemed ar mor.

« Eur gér am oa, eus ar c'haera,
« Ha setu hi, aet da netra !... »
Hag e gaion holl a frailhas,
Hag e zaoulagad a ouelas.

« D'an daoulin, eme Wennole,
« Gralon d'an daoulin ganen-me. »
Ha Gralon, dindan e c'hlac'hар,
A gouez, d'an daoulin, d'an douar.

Hag eno dispak e vlev gwenn
Hag e dal pleget er boultnenn
E lavare c'hoaz ar roue :
« Ra vo grêt, dalc'h mat, youl Doue !... »

Pa zavas diwar e zaoulin,
Dindan tan flamm heol ar mintin
E welas a-dreuz e zaelou,
O lugerni Ru-Men-Goulou.

War ar men-ze, hon tadou koz
A skuilhe gwad d'eun Doue faos,
Hag ar roue, e berr amzer,
A lavaras d'e vignon ker :

« Du-hoñt, en envor a Ger-Iz,
« Me a ray sevel eun iliz,
« Hag evit testeni d'an holl,
« M'he galvo iliz Rumengol.

« Pa vo an doueou maro
« Ha kquezet meur a goad dero,
« Eun deiz, eus ar peder avel
« E teuio, di, pobl Breiz-Izel ! »

Savet gant Olier SOUETR, eus a Blourin-Montroulez, ha J.-P. AR SKOUR, eus a Rumengol, wardro ar bloaz 1850.
